

四庫全書

史部

欽定四庫全書

史部
元和郡縣志卷九

詳校官編修臣曹城

檢討臣德生覆勘

總校官庶吉士臣倉聖脉

校對官學正臣李巖

謄錄舉人臣李元位

欽定四庫全書

元和郡縣志卷七

唐李吉甫撰

河南道二

陝州

陝郡大都督府

開元戶四萬七千三百二十二

鄉五十六

元和戶八千七百

鄉六十六

今為陝號觀察使理所

管陝州號州汝州管縣二十一都管戶一萬一

千九百四十七

禹貢豫州之域周為二伯分陝之地公羊傳曰自陝以東周公主之自陝以西召公主之又為古之虢國今平陸縣地是也戰國時為魏地後屬韓秦并天下屬三川郡漢為弘農郡之陝縣自漢至宋不改後魏孝文帝太和十一年置陝州以顯祖孝文皇帝諱弘改為恒農郡十八年罷陝州孝武帝永熙中重置西魏文帝大統三年又罷周明帝復置屯兵于此以備齊隋大業二年復罷以其地屬河南郡義寧元年改置弘農郡武德元年

改為陝州廣德元年改為大都督府謹按陝城蒲牢與彭城滑臺壽陽懸瓠屢經攻守皆中夏之要云

州境

東西二百五十二里
南北隔河二百四十六里

八到

西至上都五百一十里
東至東都三百五十里

西南至虢州一百三十里
北至絳州一百里

西至潼關二百里
西北至河中府二百四十五里

貢賦

開元貢
賦
柏子仁
瓜蒌
絁
絹
綿
絲
布

管縣八

陝 硤石 靈寶 夏 安邑 平陸

芮城 垣

陝縣

望郭下

本漢縣也歷代不改後魏改為陝中縣西魏去中字周明帝于陝城內置嶠郡以陝嶠二縣屬焉隋開皇罷郡以縣屬陝州

陝原在西南二十五里

號山在縣西二里臨黃河自靈寶界流入後漢獻帝東

歸至陝議者欲令天子浮河東下太尉楊彪曰從此以東有三十六灘非萬乘所當從也乃止

曹陽墟俗名七里澗在縣西南七里獻帝東遷李傕郭汜追戰于弘農東澗天子遂露次于曹陽之墟謂此地也

州里城即古號國城西征記曰陝縣周召分職處南倚山原北臨黃河懸水百餘仞臨之者皆為悼慄故焦城在縣東北百步

太原倉在縣西南四里隋開皇二年置以其北臨焦水
西俯大河地勢高平故謂之太原今倉實中周迴六里
太陽故關在縣西北四里後周大象元年置即茅津也
春秋時秦伯伐晉自茅津濟封峭尸而還

徽伯故壘在縣南二里高歡使李徽伯戍陝州太祖攻
之徽伯築壘于此拒太祖

北利人渠隋開皇六年文帝遣邳國公蘇威引橐水西
北入城百姓賴其利故以為名

南利人渠東南自硤石界流入與北渠同時疏導

太陽橋長七十六丈廣二丈架黃河為之在縣東北三里貞觀十一年太宗東巡遣武侯將軍丘行恭營造

硤石縣

望西至府五十里

本漢陝縣地屬弘農郡自漢至宋不改後魏孝文帝分陝縣東界置崤縣明帝二年分陝崤二縣置崤郡隋文帝罷郡以崤縣屬陝州大業二年廢入陝縣義寧元年重置理硤石塢貞觀中改名硤石縣

底柱山俗名三門山在縣東北五十里黃河中禹貢曰
導河積石至于龍門又東至于底柱河水分流包山山
見水中若柱然也又以禹治洪水山陵當水者破之以
通河三穿既決河出其間有似于門故亦謂之三門漢
成帝鴻嘉四年楊焉上言底柱之險可鑄廣之上乃令
鑄之纔沒水中不能復去而令湍流沸怒為害彌甚隋
開皇三年遣倉部侍郎韋瓚自蒲陝以東募人能于洛
陽運米四十石經砥柱之險達于常平者免其征戍貞

觀十二年太宗東巡臨幸于此令魏徵勒銘

莘野在縣西十五里春秋時有神降于此

黃河西自陝縣界流入東經底柱水經注曰魏景初二
年帝遣諫議大夫寇慈帥工五千人歲常修治以平河
阻

魏長城在縣北二十二里魏惠王十九年所築東南起
崤山西北至河三十七里

靈寶縣

望東北至州七十五里

金史卷之二十一
本漢弘農縣自漢至後魏不改隋開皇十六年于今縣置桃林縣屬陝州天寶元年于縣南古函谷關尹真人宅掘得天寶靈符遂改縣為靈寶

稠桑宅在縣西十里號公敗戎于桑田即此也

函谷故城在縣南十里秦函谷關城漢弘農縣也西征記曰函谷關城路在谷中深險如函故以為名其中劣通東西十五里絕岸壁立崖上柏林蔭谷中殆不見日關去長安四百里日入則閉雞鳴則開秦法也東自崤

山西至潼津通名函谷號曰天險所謂秦得百二也隗
囂將王元說囂曰請以一九泥東封函谷關即此也

桃林塞自縣以西至潼關皆是也春秋時晉侯使詹嘉
處瑕守桃林之塞三秦記曰桃林塞在長安東四百里
若有軍馬經過好行則牧華山休息林下惡行則決河
漫延人馬不得過矣

涇津在縣西北三里隋義寧元年置關貞觀元年廢關
置津

曹陽亭在縣東南十四里陳涉使周文西入秦秦使章邯擊破之殺文于曹陽即此地也後曹公改為好陽

夏縣

望西南至州一百二十里

本漢安邑縣地屬河東郡後魏孝文帝太和十一年別置安邑縣十八年改為夏縣因夏禹所都為名隋大業

二年屬河東郡武德元年又屬虞州

今陝州安邑縣是也

貞觀十

七年隸絳州大定元年割屬陝州尋屬絳州乾元三年

屬陝州

涑川在縣北四十里左傳晉侯使呂相絕秦曰伐我涑川按川東西三十里南北七里

安邑故城在縣東北一十五里夏禹所都也

安邑縣

望南至州一百一十里

本夏舊都漢以為縣屬河東郡隋開皇十六年屬虞州貞觀十七年屬蒲州乾元三年割屬陝州

雷首山一名中條山在縣南二十里其山有銀谷在縣西南三十五里隋及武德初並置銀冶監今廢

高堆原在縣北三十里原南坂口即古鳴條陌也湯與
桀戰于此

鹽池在縣南五里即左傳郇瑕氏之地沃饒近鹽是也
今按池東西四十里南北七里西入解縣界

平陸縣

望西南至州一百七十里

本漢太陽縣地屬河東郡後漢于此置河北郡領河北
縣隋開皇十五年河北縣改屬蒲州貞觀元年又屬陝
州天寶元年改為平陸縣

黃河在縣南二百步

吳山即吳坂也伯樂遇騏驎駕鹽車之地其坂自上及下七山相重

傅巖在縣

缺

七里即傳說版築之處

閒原在縣西六十五里即虞芮爭田讓為閒田之所

顛軫坂今謂之軫橋在縣東北四十五里左傳曰冀為不道入自顛軫是也

瑟瑟窟在縣西北四十里

故虞城在縣東北五十里虞山之上晉侯使荀息假道于虞以伐虢即此城也

下陽故縣在縣東北二十里

芮城縣

望東至州一百里

本漢河北縣地屬河東郡自漢至後魏因之周明帝二年改名芮城屬河北郡其年又于此置虞州武帝建德二年于縣置芮州貞觀元年廢芮州以縣屬陝州

黃河在縣南二十里

故魏城春秋晉滅之賜畢萬是也在縣北五里

故芮城在縣西二十里古芮伯國也

垣縣 上西南至州二百里

本漢縣屬河東郡後魏獻文帝皇興四年置邵郡及白水縣周明帝武成元年改白水為亳城縣隋大業三年改亳城為垣縣屬絳郡武德元年屬邵州九年屬絳州貞元三年割屬陝縣枕黃河

垣城在縣西二十里

金史卷之七
卷七
皋落城在縣西北六十里左傳曰晉侯使太子申生伐
東山皋落氏是也

虢州 弘農望

開元戶一萬七千七百四十二
元和戶五千二百三十六

鄉五十
鄉三十六

禹貢雍及豫二州之境周初為虢國虢有三北虢今陝
州平陸縣東虢今滎陽縣西虢在今鳳翔扶風縣也魯
僖二年晉荀息假道于虞以伐虢虢亡仍為晉地其後
三卿分晉屬韓秦兼天下屬三川郡至漢武帝元鼎四

年置弘農郡後魏以獻文帝諱弘改為恒農郡孝武帝
永熙三年分為西恒農屬陝州周明帝復為弘農隋開
皇三年廢郡以縣屬陝州大業二年又改屬豫州三年
又于弘農縣置弘農郡義寧元年改為鳳林郡其年于
盧氏縣置虢郡武德元年改為虢州其年改鳳林郡為
鼎州因鼎湖以為名貞觀八年廢遂移虢州于今理所

州境

案州境里
數傳寫缺

八到

西北至上都四百三十里
東至東都四百五十三里

東至陝州一百三十里

西南至商州三百七十里

西北至潼關一百三十里自關至華州一百二十里

西北至河中府一百八十里

貢賦

開元貢

天門冬

地骨白皮

麝香

賦

絹

絕

綿

管縣六

弘農

盧氏

閿鄉

玉城

朱陽

湖城

弘農縣

望郭下

本漢舊縣隋大業二年省三年復于今湖城縣西南一

里置尋移就郡理其年移郡于鴻臚川縣亦隨徙即今縣是也義寧元年屬鳳林郡武德元年屬鼎州貞觀八

年屬虢州

方伯堆在縣東南五里宋奮武將軍魯方平所築

鴻臚水過縣北十五里入靈寶界溉田四百餘頃

盧氏縣

上西北至州一百六十六里

本漢舊縣春秋時西虢之邑地有盧氏山或言盧敖得道于此山宜五穀可以避水災隋開皇三年改為虢州

大業三年廢以盧氏屬河南郡武德元年又置虢州縣
依舊

熊耳山在縣南五十里禹貢導洛于此

閿鄉縣

望東南至州一百里

本漢湖縣地屬京兆尹自漢至宋不改周明帝二年置
閿鄉郡按閿鄉本湖縣鄉名閿古文聞字也說文從門
受聲隋開皇三年廢閿鄉郡十六年移湖城縣于今所
改名閿鄉縣屬陝州貞觀八年改屬虢州

秦山一名秦嶺在縣南五十里南入商州西南入華州
山高二千丈周迴三百餘里

黃巷坂在縣西北二十五里即潼關路也水經注曰河
水自潼關東北流水側有長坂謂之黃巷坂歷北出東
嶠通謂之函谷關岸高道陋車不得方軌魏武征韓遂
馬超連兵此地又潘岳西征賦曰遡黃巷以濟潼亦謂
此也

桃源在縣東北十里古之桃林周武王放牛之地也

黃河在縣北三里

全鳩水一名全節水漢戾太子亡匿之處

思子宮故城在縣東北二十五里漢武帝為戾太子所築也

曹公故壘在縣西二十五里魏武征韓遂馬超此地置壘又宋武之入長安檀道濟王鎮惡濱帶河險大小七營皆此處

赫連氏京觀俗號平吳臺在縣西二十二里赫連勃勃

使太原公昌攻劉裕將齡石于潼關克之築臺以表武功

玉城縣

上西北至州六十里

本漢盧氏縣地屬弘農郡後魏正始二年分立石城縣廢帝改為玉城周武帝天和元年廢隋義寧元年重置貞觀八年移于今理

朱陽縣

上東北至州七十里

本漢盧氏縣屬弘農郡後魏太和十四年蠻人樊磨背

梁歸魏立朱陽郡并朱陽縣令樊磨為太守大統三年
分為朱陽郡屬東義州周武帝保定二年又省郡宣帝
大象元年割盧氏西界以益朱陽縣隋開皇四年北屬
陝州大業三年改屬虢州

湖城縣

望東南至州五十二里

本漢湖縣屬京兆尹即黃帝鑄鼎之處後漢改屬弘農
郡至宋加城字為湖城縣

荆山在縣南即黃帝鑄鼎之處

夸父山在縣東南三十五里

湖縣故城在縣西南二里

汝州 臨汝望

開元戶二萬六千五十三
元和戶一萬三千七十九

鄉六十
鄉三十七

禹貢豫州之域春秋時周王畿及鄭楚之地後屬于晉
六國時復為韓魏之地秦屬三川郡在漢為河南郡之
梁縣地也隋開皇四年自陸渾縣界移伊州理于此大
業二年改為汝州三年改為襄城郡隋亂陷賊武德四

年討平王世充復為伊州貞觀八年改為汝州

州境

東西二百三里
南北二百五十二里

八到

西南至上都九百八十里
西北至東都一百七十里

南至蔡州四百五十里

西南至鄧州四百七十五里

東至許州二百三十里

貢賦

開元貢賦

細絕綿

管縣七

梁

臨汝

魯山

葉

襄城

郟城

龍興

梁縣

望郭下

漢舊縣古蠻子邑戰國時謂之南梁以別大梁少梁即左傳云楚為一昔之期而襲梁及霍也

蠻中聚即戎蠻子國也在今郡西南俗謂之麻城又有陽人聚故城在今縣西秦滅東周徙其君于陽人聚即此城也漢末孫堅大破董卓軍于此高齊于此置汝北郡以備周寇故城在今縣南亦名王塢城隋煬帝改梁

縣為承休縣屬汝州貞觀元年又改為梁縣

汝水經縣南三里

廣成澤在縣西四十里後漢安帝永初元年以廣成遊獵地假與貧人元初二年鄧太后臨朝鄧騭兄弟輔政以為文德可興武功宜廢請寢蒐狩之禮于時馬融以文武之道並用作廣成贊以諷按此澤周迴一百里隋煬帝大業元年置馬牧于此

周承休城在縣東北二十六里漢封周後于此

割屬于汝州

方城山在縣西南十八里楚屈完曰楚國方城以為城是也

黃城山一名苦菜山在縣西二十五里即長沮桀溺耦耕處

汝水西北流入去縣二十三里

昆陽故城在縣北二十五里後漢世祖破王尋之處

燒車水在縣南二十四里世祖破王尋燒其輜重于此

水濱因名

襄城縣

望西北至州一百四十里

本秦舊縣漢因之屬潁川郡春秋襄王避叔帶之難出居鄭地汜在今縣南一里古汜城是蓋以周襄王居此故名襄城晉及後魏屬襄城郡隋開皇三年改郡為汝州以縣屬焉大業二年廢汝州以縣屬許州開元四年置仙州割襄城屬焉二十六年廢仙州復隸許州天寶七年又屬汝州

汝水經縣南去縣一里縣理廢汝州城即古襄城楚靈所築後漢馮異據之降世祖莊子曰黃帝遊于襄城之野七聖皆迷遇牧馬童子而問道焉亦此地也

郟城縣

緊西北至州八十里

本春秋時鄭地後屬楚又入于晉七國時又屬韓至漢以為縣屬潁川郡晉屬襄城郡後魏屬南陽郡高齊省隋大業二年移父城縣于今縣西北五里屬汝州四年改父城縣為郟城縣

汝水西去縣七里

扈澗水出縣北三十里

父城故城在縣東南四十里故殷時應國也左傳楚大城父城使太子建居之

龍興縣 上西北至州九十里

本漢邾城縣地後魏太和十八年置汝南縣高齊天保七年廢隋開皇十八年復置汝南隋末廢則天證聖元年置武興縣神龍元年改為龍興縣縣城本通鵠城即

後漢賈復城也復南擊郾所築後魏太和二十三年孝文帝親征馬圈行至此城昏霧得三鵀引路遂過南山故號通鵀城

大龍山在縣東南三十五里劉累學擾龍遷于魯縣因以名山

汝水在縣北四十五里西南從梁縣界流入

湛水在縣東三十里春秋襄公十六年楚公子格帥師戰于湛阪是也

潢陽城一名應城在縣南二十五里後魏置潢陽縣隋
開皇十年改為湛水武德四年又置潢陽縣

元和郡縣志卷七

欽定四庫全書

元和郡縣志卷八

唐 李吉甫 撰

河南道 三

汴州 陳留雄

開元戶八萬二千一百九十
鄉一百六十一
元和戶八千二百一十八
鄉五十三

今為汴宋節度使理所

管汴州宋州亳州潁州
管縣二十八 都管戶三

萬一千四百四十四

禹貢豫州之域春秋鄭地戰國魏都史記魏惠王自安邑徙理大梁即今浚儀縣秦為三川郡地漢陳留郡之浚儀縣也酈生說漢高曰陳留天下之衝四通五達之郊漢文帝以皇子武為梁王都大梁以其地卑濕東徙睢陽今宋州是也漢陳留郡即今陳留縣東魏孝靜帝于此置梁州周宣帝改為汴州

以城臨汴水故也

隋大業二年

州廢以開封浚儀屬鄭州隋亂陷賊武德四年平王世

充復置汴州

州境

東西一百九十六里
南北二百三十五里

八到

西至上都一千二百八十里
西至東都四百二十里

南至宋州三百里
東南至陳州三百一十里

北至滑州二百一十里
東北至曹州二百四十五里

貢賦

開元貢
賦 絹二十疋
綿 絹

管縣六

開封 浚儀 陳留 雍丘 封丘 尉氏

開封縣

望郭下理東界

本漢舊縣屬河南郡魏為秦所敗走保開封此城也晉屬滎陽郡後魏天平元年于此置開封郡高齊天保七年廢隋開皇六年復置開封縣屬汴州大業二年廢汴州以縣屬鄭州武德四年重置汴州開封又屬焉貞觀元年廢延和元年于城內別置開封縣管東界

蓬澤在縣東北十四里今號蓬池左氏所謂蓬澤也

長垣故城一名倉垣城在縣北二十里漢陳留太守所

理

梁王吹臺在縣東南六里俗號繁臺

沙海在縣北二里戰國策齊欲發卒取周九鼎顏率說
曰夫梁之君臣欲得九鼎謀之沙海之上其日久矣即
謂此也隋文疏鑿舊跡引汴水注之以習舟師以伐陳
陳平之後立碑其側以紀功焉今無水

蓼堤在縣東北六里高六丈廣四丈梁孝王都大梁以
其地卑濕東徙睢陽乃築此堤至宋州凡三百里

浚儀縣 望郭下理西界

金少曰
卷八
本漢舊縣屬陳留郡故大梁也魏惠王自安邑徙此因浚水為名後魏置梁州陳留郡周宣帝改為汴州縣屬之隋大業二年廢汴州改屬鄭州武德四年于此重置汴州以縣屬焉

夷門史記大梁城有十二門東門隱士侯嬴年七十家貧為夷門監者魏公子無忌厚遺之不肯受遺

枯遮梁溝秦始皇二十二年王賁引水灌大梁城于此溝

琵琶溝水西自中年縣界流入通濟渠隋煬帝欲幸江都自大梁城西南鑿渠引汴水即葭蕩渠也

陳留縣

望西至州五十里

本漢陳留郡陳留縣地武帝置陳留郡屬兗州按留本鄭邑後為陳所并故曰陳留又按彭城亦有留此留屬陳故稱陳留晉為陳留國隋開皇三年分浚儀縣置陳留縣屬汴州武德四年屬杞州今汴州雍丘縣是也貞觀元年廢杞州屬汴州

故莘城在縣東北三十五里古莘國地也湯伐桀桀與
韋顧之君拒湯于莘之墟遂戰于鳴條之野

東昏故城本漢縣縣東北九十里即湯武之戶牖鄉陳
平之故里也

雍丘縣 望西至州一百一十里

本漢舊縣亦古之雍國及杞國周武王克殷封禹後東
樓公于杞後魏孝昌四年分東郡陳留置陽夏郡理雍
丘城隋開皇三年罷郡以縣屬汴州武德四年于此置

杞州貞觀元年廢以縣屬汴州

雍丘故城今縣城是也春秋時杞國城也杞為宋滅城北臨汴河晉永嘉末鎮西將軍祖逖為豫州刺史理于此逖累破石勒軍由是黃河以南皆為晉土人皆感悅逖卒百姓立祠

高陽故城縣西南二十九里顓頊高陽氏佐少昊有功受封此邑高祖攻昌邑西過高陽又酈食其墓在此外黃故城縣東六十里黃本屬宋後屬陳留郡以魏郡

金史卷八
有內黃故此為外黃

封丘縣

緊南至州五十里

古之封國

左傳魯封父之繁弱是也

後屬衛亦屬魏漢高祖與項羽

戰敗于延鄉有翟母者免其難故以延鄉為封丘縣以封翟母屬陳留郡後魏并入酸棗宣武帝又置封丘縣屬陳留郡隋開皇三年置郡以縣屬汴州

黃池在縣南七里魯哀十三年晉侯與吳子爭盟于此

尉氏縣

望北至州一百里

漢舊縣春秋時鄭大夫尉氏之邑自漢歷後魏屬陳留郡不改高齊省以地入開封府隋開皇六年復置尉氏縣屬汴州武德四年于此置洧州貞觀元年廢以縣屬汴州

三亭岡在縣西三十七里秦使謁者王稽使魏夜與范雎言曰待我于三亭之南即此岡之南也

故鍾城在縣西三十五里魏太尉鍾繇故里

宋州

睢陽望

開元戶十萬三千
鄉一百九十三
元和戶五千二百
鄉八十三

禹貢豫州之域即高辛氏之子閼伯所居商丘今州理是也周為青州之域武王封微子于宋自微子至君偃三十三世為齊魏楚所滅三分其地魏得其梁陳留齊得濟陰東平楚得沛按梁即今州地秦并天下改為碭郡後改為梁國漢文帝封子武為梁王自漢至晉為梁國屬豫州宋改為梁郡隋于睢陽置宋州大業三年又改為梁郡隋亂陷賊武德四年討平王世充又為宋州

天寶末祿山亂兩河郡縣多所陷沒惟張巡許遠姚閭
三人堅守睢陽賊將尹子奇併力攻圍逾年不克城中
孤危糧竭相食殆盡時賀蘭進明許叔冀屯軍臨淮爭
權不協不發援師城竟為賊所陷巡遠等抗詞不屈遂
俱被害然使賊鋒挫衄不至江淮巡遠之力也

州境

東西三百五十九里
南北二百一十八里

八到

西至上都一千五百八十里
西至東都九百二十里

東南至泗州七百五十里
西南至亳州一百四十里

西北至曹州一百五十里
東北至徐州三百五十里

貢賦

開元貢絹二十疋
賦綿絹

管縣十

宋城 碭山 虞城 楚丘 柘城 穀熟

下邑 單父 襄邑 寧陵

宋城縣

望郭下

漢睢陽縣屬宋國後屬梁國後魏屬梁郡隋開皇三年
罷梁郡以縣屬亳州十六年于此置宋州睢陽屬焉十

八年改為宋城

睢水西南至寧陵縣界流入

渙水西南自寧陵縣界流入

隕石水源出縣北四十里春秋時隕石于宋其處為潭
小蒙故城縣北二十二里即莊周之故里

州城古閼伯之墟契孫相土亦都于此春秋為宋國都
漢梁孝王廣睢陽城七十里開汴河後汴水經州城南
兔園縣東南十里漢梁孝王園

清泠池在縣東二里

碭山縣

上西至州一百五十里

漢碭縣屬梁國後漢不改晉以其地併入下邑宋復置碭縣屬梁郡後魏屬碭郡高齊文宣帝並廢以安陽縣屬彭城郡隋開皇十八年改安陽縣為碭山縣大業二年改屬宋州碭文石也以其山出文石故以名縣

虞城縣

上西南至州七十里

本虞國舜後所封之邑後漢及晉屬梁國後魏延昌中

于此置蕭縣理虞城屬沛郡高齊省隋開皇十六年分
下邑置虞城縣屬宋州

孟諸澤在縣西北十里周迴五十里俗號盟諸澤

故綸城縣東南三十五里左傳少康逃奔有虞虞妻以
二姚而邑諸綸

平臺縣西四十里左傳宋皇國父為宋平公所築漢梁
孝王大治宮室為複道自宮連屬于平臺三十餘里與
鄒枚相如之徒並遊其上即此也

楚丘縣

緊南至州七十里

古戎州己氏之地漢為己氏縣屬梁國後漢屬濟陰郡
北齊廢隋開皇五年又置屬曹州六年改為楚丘縣武
德五年屬戴州

今宋州單父縣是也

貞觀十七年廢戴州隸宋州

楚丘故城在縣北三十里

柘城縣

上東北至州一百一十里

本陳之株邑詩陳風株林刺靈公是也至秦為柘城縣
續漢志屬陳郡至晉太康中廢隋開皇十六年復置貞

觀初廢入穀熟寧陵二縣後縣人徭賦路遠陳訴積年
至高宗朝復置屬宋州其羅城即古株邑故城是也

渙水在縣北二十九里

穀熟縣

上西北至州五十七里

本漢薄縣地置于古穀城春秋時為穀丘亦殷之所都
謂之南亳漢于此置薄縣屬山陽郡薄與亳義同字異
後漢改置穀熟縣屬梁國隋開皇十六年屬宋州隋末
喪亂縣人劉繼叔戮力固守免陷于賊武德二年置南

穀州以繼叔為刺史四年罷以縣屬宋州

渙水在縣南二十八里

高辛故城在縣西南四十五里帝嚳初封于此

下邑縣

上西至州一百一十里

漢舊縣按魯為楚所滅頃公遷于下邑漢高祖攻下邑拔之在漢屬梁國後漢無下邑縣魏復立焉晉宋屬梁郡隋開皇三年改屬亳州十六年改屬宋州

故譙城縣北三十一里祖逖屯淮陰進據太丘城遂克

譙城而居之謂此也

單父縣

緊西南至州一百四十九里

古魯邑也漢以為縣屬山陽郡後漢以為侯國屬濟陰郡後魏置北濟陰郡理單父城隋開皇三年廢郡又置單父縣屬濟陰郡十六年于縣置戴州單父屬焉大業二年廢戴州以縣屬曹州武德五年重置戴州縣又屬焉貞觀十七年廢戴州縣隸宋州

漢高祖后呂氏單父人宓子賤巫馬期皆

宰單父

襄邑縣

緊東至州一百一十四里

本漢舊縣即春秋時宋襄牛地也秦始皇徙承筐縣于襄陵改為襄邑縣漢以縣屬梁後又屬陳留宋屬譙郡高齊文宣帝省入雍丘隋開皇十六年復置襄邑縣屬杞州大業三年割屬梁郡武德二年復置杞州以縣屬焉貞觀元年州廢縣隸宋州

睢水西自雍丘縣界流入

承筐故城在縣西南二十五里

宋襄公墓在縣城中東隅故號襄陵

寧陵縣

緊東至州五十九里

本漢舊縣寧亦作甯七國時屬魏魏安釐王以弟無忌為信陵君邑于此漢初以魏咎為甯陵君亦在此漢志寧陵屬陳留郡後漢屬梁國晉屬宋郡改屬譙郡高齊省隋開皇六年復置屬亳州十六年割屬宋州

睢水西北自襄邑縣界流入

渙水西自襄邑界流入

故葛城在縣北十五里古葛伯國以不祀為湯所滅
大棘故城在縣西南七十里左傳宋華元鄭公子歸生
戰于大棘又七國反先擊梁棘即此城也

洧陵在縣南二十五里春秋鄭子罕伐宋宋將鉏樂懼
敗諸洧陵

故柘城在縣南七十里陳之株邑

故鄆城在縣南五十三里漢之鄆縣鄭伯克段于此

已吾城在縣西南四十里後漢已吾縣故城曹公初起

兵于此

始基故城在縣南九十里晉蔡州刺史祖逖督護衛策所築初乞活魁遣陳川據陳留浚儀遣將魏碩于谷水南營逖遣策等追戰大破之因即立戍留守策曰從祖公北伐數年功始基于此因以為名

仇留故城在縣南六十五里初陳川自始基敗後遣將仇留伐鄆以逼蔡州祖逖遣衛策進戍谷北高丘以禦仇留故呼為仇留城

亳州望譙郡

開元戶七萬七百三十二
元和戶六千五百二

鄉一百三十七
鄉一百六十一

禹貢豫州之域至周不改春秋時為陳國之焦邑六國時屬楚在秦為碭郡地漢為譙縣屬沛郡初後漢熹平五年黃龍見譙太史單颺以為其地當有王者興不及五十年亦當復見後如其言魏文帝即位黃初元年以先人舊郡又立為譙國與長安許昌鄴洛陽號為五都後魏復置南兗州周武帝改為亳州隋亂陷賊武德四

年討平王世充復為亳州

州境

東西三百六十七里
南北二百里

八到

西至上都一千七百二十里
西至東都八百六十里

正南微東至潁州二百六十里
西至陳州二百里

西北至宋州一百四十里
東北至徐州三百九十里

貢賦

開元貢
賦 綿 絹 二十疋

黍 稷 麻 麥

管縣八

譙 臨渙 鄴 城父 鹿邑 蒙城

永城 貞源

譙縣

緊郭下

漢舊縣屬沛郡晉屬譙郡後魏無譙縣有小黃縣隋開皇三年以小黃縣屬亳州大業二年改小黃縣為譙縣三年以亳州為譙郡縣仍屬焉

渦水在縣西四十八里魏黃初六年文帝以舟師自譙循渦入淮

魏文帝祠在縣東五里初魏太祖以議郎告疾歸鄉里

築室于此讀書秋冬弋獵以自娛文帝以漢中平四年
生于此宅

故梅城在縣南四十里古梅伯國

臨渙縣

緊西至州一百六十里

本漢鉅縣屬沛郡後漢屬沛國魏屬譙郡梁武帝普通
中克鉅城置臨渙郡以臨渙水為名後魏改置渙北縣
北齊省臨渙郡改渙北縣為臨渙縣屬譙郡隋開皇三
年廢郡留縣改置譙州神堯嘗為譙州刺史大業二年

改屬亳州武德四年屬譙州貞觀十七年廢譙州縣隸
亳州

嵇山在縣西三十里晉稽康家于鉉嵇山之下因改姓
嵇氏

鄴縣 上西南至州七十里

秦漢舊縣屬碭郡漢屬沛郡蕭何封鄴侯此邑也魏鄴
縣屬譙國後魏省隋開皇十六年復置鄴縣屬沛郡武
德四年改屬亳州

城父縣

上西北至州七十九里

春秋時陳國之夷邑亦名城父漢為城父縣屬沛郡後漢屬汝南郡晉屬譙郡宋志闕而有浚儀縣隋開皇十八年以重名復改為城父屬亳州

渦水西北自譙縣界流入

淝水東南至下蔡入淮

扶陽故城在縣東北三十六里漢韋賢封邑

章華臺縣南九里

高陂縣南五十六里周迴四十三里多魚蚌菱芡之利

鹿邑縣

上東至州一百一十七里

本漢鄆縣地春秋時鳴鹿邑屬陳國左傳晉智武子以諸侯之師侵陳至于鳴鹿是也晉屬陳留郡隋開皇三年改屬亳州為鹿邑縣

渦水西北自陳州太康縣界流入

鹿邑故城縣西十三里俗名牙鄉城

案牙互古通王應麟謂即論語之互

鄉春秋時鳴鹿邑也

武平故城縣東北十八里建安元年漢獻帝以曹公為大將軍封武平侯以此城為封邑

蒙城縣

上西北至州二百四十里

本漢山桑縣屬沛郡後漢改屬汝南郡魏屬譙郡後魏孝文帝于此置渦州理山桑城其地後入于梁梁于此置西徐州後復入魏改為譙州改譙縣為渦陽縣隋改渦陽為淝水縣武德四年重立山桑縣屬譙州貞觀十七年廢譙州割屬亳州天寶二年改為蒙城縣

縣城北臨渦水後魏渦州城也東魏武定六年侯景叛行臺慕容紹宗破景于此

檀公城本漢山桑縣城宋檀道濟為征北將軍居此因名之

永城縣 上西南至州一百四十里

因隋舊縣本秦芒縣地漢不改後為臨睢縣之境晉斬縣地隋大業六年于馬甫城東北三里割彭城睢陽置縣遂名永城屬譙郡武德五年移于馬甫城屬譙州即

今理是也貞觀十七年罷譙州以縣屬亳州

碭山縣南五十里漢祖隱芒碭山澤間應劭注芒今在臨睢即永城縣是也碭屬梁國今碭山縣是二縣之界有山澤之固可以隱也

故費城縣南二十里

貞源縣

望東至州五十九里

本楚之苦縣春秋時屬陳後為楚所併漢屬淮陽國後漢苦縣屬陳國晉屬梁郡成帝更名谷陽高齊省入武

平縣隋開皇六年復置谷陽縣理苦城屬亳州乾封元年高宗幸瀨鄉以玄皇帝生于此縣遂改為貞源縣寧平故城在縣西南五十五里漢縣也晉永嘉五年東海王越自陽城率甲士四萬薨于項秘不發喪石勒兵追之及寧平城焚越屍于此數萬衆斂手受害尸積如山王夷甫亦遇害

玄元皇帝祠縣東一十四里祠院中有九井隋季井皆竭自武德以來清泉沁漏或云汲一井而八井水皆動

李母祠在縣東一十四里乾封元年冊號先天太后今
謂之洞霄宮

潁州 汝陰上

開元戶二萬八千一百七十九 鄉五十六
元和戶一萬一千五百二十九 鄉六十一

禹貢豫州之域春秋胡子國楚滅之秦併天下為潁川
郡之地在漢則汝南郡之汝陰縣也魏晉于此置汝陰
郡司馬宣王使鄧艾于此置屯田後魏孝昌四年改置
潁州高齊罷州置郡隋末陷賊武德四年討平王世充

于汝陰縣西北十里置信州六年改為潁州移于今理

州境

東西三百五十七里
南北一百九十六里

八到

西取陳州路至上都一千八百二十里
西至東都九百六十里

東至壽州二百六十里

南至淮約一百里

西至蔡州三百六十里

西北至汴州七百里

西北至亳州二百六十里

貢賦

開元貢 純二十疋 綿二十七屯
案開元賦傳寫缺

管縣四

汝陰 沈丘 潁上 下蔡

汝陰縣

上郭下

本漢舊縣屬汝南郡魏文帝黃初三年屬汝陰郡後魏孝昌三年于此置潁州北齊廢以縣屬汝陰郡隋開皇三年罷郡以縣屬潁州武德初置信州六年復為潁州縣皆屬焉

淮水西南流入經縣南去百里

潁水西北自陳州項城縣界流入伏于城下

汝水西南自蔡州新蔡縣界流入又東南入淮

寢丘故城在縣西北一百二十里楚相孫叔敖將死戒其子請寢丘之地即此

古任城在縣北一里陳將任蠻奴伐齊于潁水北岸築城以圍池陰

百尺堰在縣西北一百里司馬景王討王凌至百尺堰即此

沈丘縣

中東南至州一百二十六里

本漢寢丘孫叔敖子之封一名沈丘漢為寢縣屬汝南
郡後漢加丘字東魏于此置才州高齊文宣廢州改置
褒信縣隋不置縣邑至神龍二年十道使唐儉奏請分
汝陰置沈丘縣

小汝水在縣北

潁上縣 中西北至州一百一十七里

本漢慎縣地屬汝南郡自漢訖宋不改隋大業二年置
潁上縣屬潁州三年以潁州為汝陰郡縣仍屬焉武德

四年移于今理

淮水西南自汝陰縣界流入去縣七十里又東北入下

蔡縣界

潁水西自汝陰縣界流入又東流入淮

下蔡縣

上西至州二百二十里

本漢舊縣古蔡國又吳州來之邑也按蔡國本都上蔡又徙新蔡後又遷此故謂之下蔡漢以為縣屬沛郡後漢屬汝南郡隋大業二年屬潁州十二年移于今理武

德四年于此置渦州下蔡屬焉八年州廢縣屬潁州

硤石山在縣西南六十里淮水經硤石中對岸山上築二城以防津要今按淮水以中流分界在西岸者屬下蔡在東岸者屬壽陽

淮水西南自潁上縣界流入

淝水經縣理南去縣一里入淮

硤石城魏諸葛誕反王昶據硤石以逼誕即此城又晉孝武帝太元八年聞苻堅入寇乃遣龍驤將軍胡彬將

水軍五千援壽春既陷退保硤石亦此城也今之縣城在舊城東北十餘里

鄧艾廟在縣西一百二十步艾為魏將作陂營屯田後人賴其利因為立祠

元和郡縣志卷八

欽定四庫全書

元和郡縣志卷九

唐 李吉甫 撰

河南道 四

滑州 靈昌望

開元戶五萬三千六百二十七 鄉一百五
元和戶八千五十六 案鄉數傳寫缺

今為鄭滑節度使理所 管滑州鄭州 管縣十四
都管戶二萬二千

禹貢兗州之域春秋時為衛國左傳曰狄滅衛衛立戴

公以廬于曹

今州城東北五里白馬故城即衛之曹邑也

衛文公自曹邑遷

于楚丘

今衛南縣也

衛成公又遷于帝丘

今濮州濮陽縣是也

戰國時

其地屬魏始皇五年拔魏二十城初置東郡漢因之後

漢末袁紹以曹公為東郡太守東晉時慕容德自鄴南

徙滑臺僭號南燕都于胙城至超徙都廣固為宋所滅

宋武帝既平慕容之後盡得河南之地于此置兗州仍

置東郡宋之北境守在此其城在古滑臺甚險固後魏

宋文帝使王玄謨攻圍二十日不能取隋開皇九年又

于今州理置杞州十六年改杞州為滑州

取滑臺為名

大業

三年又改為東郡武德元年罷郡置滑州二年陷寇四

年討平王世充依舊置滑州

州境

東西二百三十六里
西北一百四十九里

八到

西南至上都一千四百四十里
南至汴二州一百一十里

東南至曹州二百四十里
西南至鄭州三百里

正西微南至衛州一百一十五里
北至相州一百三十里

東北至濮州二百一十五里

貢賦

開元貢賦

方紋綾
綿絹

卷九

管縣七

白馬

韋城

衛南

胙城

靈昌

酸棗

匡城

白馬縣

望郭下

本衛之曹邑漢以為縣屬東郡

因白馬
津為名

隋開皇三年屬

汴州九年屬杞州十六年改杞州為滑州縣又屬焉

白馬山在縣東北三十四里開山圖曰有白馬羣行山

上悲鳴則河決馳走則山崩津與縣蓋取此山為名

黃河去外城二十步

州城即古滑臺城城有三重又有都城周二十里相傳云衛靈公所築小城昔滑氏為壘後人增以為城甚高峻堅險臨河亦有臺慕容時宋公遣征虜將軍王仲德攻破之即魏武破袁紹文醜于此岸者

鹿鳴故城縣北三十里宋書宋將王玄謨據滑臺宣令走鹿鳴城是也

黎陽津一名白馬津在縣北三十里鹿鳴城之西南隅
酈食其說漢祖曰守白馬之津塞飛狐之口以示諸侯
則天下知所歸矣謂此津也建安五年曹公征先主先
主奔袁紹曹公擒關羽拜為偏將軍紹遣顏良攻劉延
于白馬曹公使羽擊之羽刺殺良于萬衆之中遂解白
馬之圍後慕容德為魏軍所逼率戶四萬餘徙于鹿鳴
達黎陽津昏而冰合是夜濟河訖旦而魏師至冰亦尋
泮德悅以為神助因改黎陽津為天橋津

河侯祠在縣南一里漢王尊為東郡太守河水盛浸瓠子隄尊臨決河不去後人嘉尊壯節因為立祠

韋城縣

上西北至州六十里

本漢白馬縣地殷伯豕韋之國也左傳范宣子曰昔我之祖在夏為御龍氏在商為豕韋氏杜注東郡白馬縣東南有韋城是也隋開皇六年分白馬縣南境置韋城縣屬汴州九年屬杞州十六年屬滑州

京觀在縣北二百步王莽篡漢東郡太守翟義舉兵莽

遣將王邑等八將敗義于此乃築焉俗號髑骨臺

衛南縣

上西南至州五十五里

本漢濮陽縣地隋開皇十六年于此置楚丘縣屬滑州
後以曹州有楚丘縣改今名

鐵丘在縣東南十里

故鉏城在縣東十五里左傳后羿自鉏遷于窮石是也

胙城縣

上北至州九十里

本古之胙國左傳凡蔣邢茅胙祭周公之肩也又為古

之燕國左傳魏人燕師伐鄭是也漢為南燕縣其後慕容德都之復號東燕縣隋開皇三年廢東郡以縣屬汴州十八年文帝因覽奏狀見東燕縣名因曰今天下一統何東燕之有遂改為胙城屬滑州武德二年于此置胙州領胙城又置東燕縣四年廢州胙城屬滑州石丘在縣東北三十里俗傳漢成帝時星隕之名也濮水縣南二十里西南自酸棗縣界流入

靈昌縣

上東北至州七十里

本漢南燕縣地自漢至隋不改開皇十六年分東燕酸棗二縣置靈昌縣取靈昌津以為名屬滑州

黃河在縣北一十里

赤眉故城在縣東二十四里漢末赤眉賊帥樊崇築延津即靈昌津也在縣東北二十二里初石勒伐劉曜至河渚不得渡時流澌下流因風結冰濟訖津勒自以為得天助故號靈昌津又左傳鄭太叔收貳以為己邑至于廩延又曹公北救劉延至延津皆此津也

酸棗縣

望東北至州一百二十里

本秦舊縣屬陳留郡以地多酸棗其仁入藥用故為名
後魏併入小黃宣武帝復置改屬東郡隋開皇三年屬
汴州九年屬杞州十六年改屬滑州

黃河在縣北二十里

酸棗故城在縣西南十五里六國時韓王所理處舊址
猶存

金堤在縣南二十三里漢文帝時河決酸棗東潰金堤

即此堤也

匡城縣

上西北至州一百里

古衛之匡邑論語子畏于匡至漢為長垣縣地自漢至後魏不改隋開皇十六年于此置匡城縣屬滑州

故匡城在縣西南十里

故蒲城在縣北一十五里左傳齊侯衛侯胥命于蒲子路為蒲宰皆此也

訾婁故城縣西北十六里

故鶴城縣西南十五里衛懿公養鶴于此

鄭州 滎陽雄

開元戶六萬四千六百一十九 鄉一百二十四
元和戶一萬三千九百四十四 鄉一十八

禹貢豫州之域春秋時為鄭國本高辛氏火正祝融之
墟也周宣王母弟友為周司徒食采于鄭是為鄭桓公
後幽王為犬戎所殺桓公死之其子武公與平王東遷
平定虢郛之地故左傳曰我周之東遷晉鄭焉依是也
自武公後二十二公至六國時鄭為韓哀侯所滅哀侯

二年韓自平陽徙都鄭秦并天下屬三川郡漢高祖改三川為河南郡滎陽屬焉晉武帝分河南置滎陽郡東魏孝靜帝分滎陽置成臯郡高齊文宣帝又改為滎陽郡周改為滎州隋開皇三年改滎州為鄭州十六年分置管州大業二年廢鄭州改管州為鄭州隋末陷賊武德四年五月擒建德王世充東都平其月置鄭州理虎牢其年又于今鄭州理置管州貞觀元年廢管州七年自虎牢移鄭州于今理

州境

東西一百七十六里
南北二百里

八到

西至上都一千一百四十里
西至東都二百八十里

東至汴州一百四十里
南至許州一百八十六里

東北至滑州三百里
北至黃河八十里

貢賦

開元貢
麻黃
賦
綿
絹

管縣七

管城
滎陽
滎澤
原武
陽武
新鄭

中年

管城縣

望郭下

本周封管叔之國自漢至隋皆為中牟縣開皇十六年
于此置管城縣屬管州大業三年改管州為鄭州縣又
屬焉

梅山縣西南三十里春秋時楚蒍子馮率師侵費滑右
迴梅山即此山也

圃田澤縣東三里

故市城縣西北三十里曹公擊袁紹軍于故市即此城

也

武強城縣東三十一里曹參擊項羽還攻武強即此城

也

祭城縣東北十五里

邲城縣東六里晉荀林父帥師與楚子戰于邲即此城也

李氏陂縣東四里後魏孝文帝以此陂賜僕射李沖故俗呼為僕射陂周迴十八里

滎陽縣

緊東至州六十里

本漢舊縣屬滎陽郡高齊改郡名成臯以縣屬焉隋開皇三年罷郡以縣屬鄭州萬歲通天元年改為武泰縣仍隸河南府神龍初復為滎陽屬鄭州

京水出縣南平地

索水出縣南三十五里小徑山

古大索城今縣理是也楚漢戰于京索間漢書注京縣有大索亭小索亭晉末滎陽人張卓董遇鳩集流散守

固此城因名大柵塢今呼為大刺蓋音之訛耳

小索城縣北四里宋南平王鑠遣王陽兒據小索破魏
即此城也

京縣故城縣東南二十里即鄭京城太叔之邑

滎澤縣

望東南至州五十里

本漢滎陽縣地隋開皇四年分滎陽置廣武縣取山為
名仁壽九年改為滎澤屬鄭州

廣武山縣西二十里一名三皇山

教山縣西十五里春秋時晉師救鄭在教鄆之間教鄆二山名宋武北征記曰教山秦時築倉于山上漢高祖亦因教倉傍山築甬道下汴水即此山也

黃河北去縣十五里

滎澤縣北四里禹貢濟水溢為滎今濟水亦不復入也東廣武西廣武二城各在一山頭相去二百餘步在縣西二十里漢高祖與項羽俱臨廣武而軍今東城有高壇即是項羽坐太公于上以示漢軍處

踐土臺故王宮縣西北十五里北臨汴水南帶三皇山
秦所置仲丁遷于囂此也詩搏獸于敖即此

金堤縣西北二十二里漢文帝時河決酸棗潰金堤東
郡大興卒塞之武帝時王尊為東郡守又加修築至明
帝永平十二年詔樂浪人王景築堤起自滎陽東至千
乘海口千餘里十里立一水門更相迴注無復潰漏之
患此隄首也

原武縣

緊南至州六十里

本漢舊縣屬河南郡後魏屬滎陽郡東魏改置廣武縣
又屬焉高齊天保七年郡縣並廢隋重置原武縣屬鄭
州武德四年屬管州貞觀元年復屬鄭州

黃河縣北二十里

古陽池城竹書紀年曰惠王十五年遣將龍賈築陽池
以備秦即此也開皇六年于此置縣今縣理

陽武縣

緊西南至州一百里

本漢舊縣屬河南郡晉屬滎陽郡

黃河縣北三十里

南棣城北棣城二故城在縣北十里春秋楚伐陳諸侯會于北棣以救之此也

汴渠一名葭宕渠今名通濟渠西南自滎澤管城二縣界流入

博浪沙縣東南五里張良為韓報仇擊始皇處

新鄭縣

緊東北至州九十里

本有熊氏之墟又為祝融之墟于周為鄭武公之國都

韓哀侯滅鄭自平陽徙都之秦并天下其地為潁川郡
漢以為新鄭縣屬河南郡晉省隋開皇十六年重置屬
鄭州

陘山縣西南三十里史記魏敗楚于陘山山上有子產
墓墓累石為方墳墳東有廟皆東向即杜元凱終制所
言者

函陵縣北十三里左傳晉侯秦伯圍鄭晉軍函陵秦軍
汜南此也

溱州府城即東魏河南道行臺侯景營軍之壘

溱水源出縣西北三十里平地

鄆城縣東北三十二里

洧水縣西北二十里灌潁渠首受洧水西魏遣王思政固守長社城東魏相高澄遣將清河王高岳攻之築堰通洧水渠灌破長社城即此渠也

中牟縣

緊西至州七十里

本漢舊縣屬河南郡晉屬滎陽郡魏太武帝省併陽武東魏孝

靜帝分滎陽置廣武郡隋氏避諱改為內年屬管州今
縣理是也開皇十八年改為圃田縣大業十三年陷李
密武德三年李勣招撫東夏于此置牟州復改為中年
貞觀元年屬汴州龍朔二年復隸鄭州縣理即古中年
故城論語佛肸以中年叛後漢魯恭為縣令有善政人
為立祠

圃田澤一名原圃縣西北七里其澤東西五十里南北
二十六里西限長城東極官渡上承鄭州管城縣界曹

家陂又溢而北流為二十四陂小鵠大鵠小斬大斬小灰大灰之類是也

官渡臺俗號中年臺亦名曹公臺在縣北十二里曹公破袁紹于此

許州 潁川望

開元戶五萬九千七百一十七 鄉一百十七
元和戶五千二百九十一 鄉五十七

今為陳許節度使理所 管許州陳州 管縣十三
都管戶九千三百二十

九

禹貢豫州之域周又為許國春秋定公六年鄭滅許七年又封許自是附庸于鄭周末為晉地三卿分晉其地屬韓秦滅韓虜韓王安以其地置潁川郡理陽翟漢高帝五年為韓國以韓信為王六年復為潁川郡後漢獻帝初遭董卓之亂遷都長安卓死東歸于洛魏太祖迎帝都許及魏受禪改許縣為許昌縣然魏雖都洛而宮室武庫猶在許昌又析潁川增置襄城縣晉咸和二年征西庾亮表成帝曰潁川襄城本是一郡戶口今少請

還合潁川從之宋受禪後魏明帝使達奚斤伐宋長驅
至虎牢潁川許並入于後魏後又陷于東魏高澄就古
潁陰城改置南鄭州即今州城是也隋仁壽元年改南
鄭州為許州隋末陷王世充武德四年世充平復為許
州

州境

東西二百一十七里
南北一百六十六里

八到

西至上都一千二百六十里
西北至東都三百四十里

東南至陳州二百六十里
正南徼東至蔡州三百里

北至鄭州一百八十六里

東北至汴州二百三十里

貢賦

開元貢 蔗心席 乾柿

賦 綿 絹

管縣七

長社 長葛 許昌 鄢陵 臨潁 舞陽

扶溝

長社縣

望郭下

本漢舊縣屬潁川郡春秋時鄭長葛地其社中樹暴長漢更名長社後漢屬郡不改隋開皇三年罷郡以縣屬

汴州大業三年改為潁川縣武德四年復為長社改屬許州

潁水西南自襄城縣界流入

潁水俗名勅水經縣西其源出密縣大騁山

長葛縣

緊南至州六十里

本漢長社縣地隋分置長葛縣屬許州取舊名

洧水自北流入去縣十三里

長箱城東魏武定五年清河王高岳率衆圍西魏將王

思政于潁川因築此城初以車箱為樓因名長箱城隋開皇六年又于此立縣今縣理是

長葛故城縣北十三里

長社故城縣西一里西魏大統十三年詔遣河南行臺大都督王思政進據潁川東魏遣將清河王高岳率衆十萬圍潁川思政不與戰岳造高堰引洧水以灌城十五年潁川城陷水自東北入城思政為岳所執即此城也

東偏城縣東北五里左傳齊人鄭人伐許許莊公奔衛
鄭伯使百里奉許叔居許東偏即此城也

許昌縣

上西南至州五十五里

本許國為楚所滅至漢為縣屬潁川郡後漢因之魏太
祖迎獻帝都許文帝受禪改為許昌宋志無許昌縣天
平元年復置今縣理是也高齊文帝省鄆陵入許昌隋
文帝又于鄆陵縣置洧州以縣屬焉大業二年廢洧州
以縣屬許州初魏武既破黃巾經略四方而苦軍食不

足羽林監潁川棗祗建置屯田于是以任峻為典農中
郎將募人屯田許下得穀百萬斛郡國列置田官數年
之間所在倉儲盈積

洧水西北自長葛縣流入去縣三十里

故許昌城縣南四十里即許國故城

許昌宮在許昌故城中楊修作許昌宮賦即此宮也

魯城縣南四十里左氏鄭伯請以太山之祊易許田而
祀周公即此城

景福殿基址今在許昌故城內西南隅

鄆陵縣

上西南至州七十五里

本漢舊縣屬潁川郡春秋鄭伯克段于鄆晉楚戰于鄆陵並此地後魏潁川置許昌郡仍立鄆陵縣以屬焉高齊文宣帝廢鄆陵以其地入許昌縣隋開皇三年復置屬許州十六年又于縣理置洧州縣仍屬焉大業二年廢洧州以鄆陵屬許州

洧水西北流入經縣西十里

鄆陵故城縣西北十五里

太丘城縣西南二十里陳寔嘗為此縣長

故陶城縣南五十里相傳晉陶侃征杜弢所築

臨潁縣

上西北至州六十里

本漢舊縣屬潁川郡歷代因之隋開皇三年罷郡以縣屬許州大業四年自故城移于今理建中二年屬潁州貞元二年州廢依前屬許州

臨潁阜東西長五十里即龍脾岡也嵩高山東南三百

里有龍脾其地沃壤可居即此岡也今臨潁縣理在岡上

潁水西北自長社縣界流入

繁昌故城縣西北三十里魏文帝行至繁陽亭築壇受禪因置繁昌縣即此城也

舞陽縣

上東北至州一百六十里

本漢舊縣屬潁川郡在舞水之陽因名漢封樊噲魏封司馬宣王並為舞陽侯皆此邑自漢至晉不改宋省開

元四年重于故城內置

扶溝縣

望西至州一百一十里

本漢舊縣屬淮陽國後漢屬陳留郡魏屬許昌郡高齊
文宣帝自今縣北移于今理武德四年置北陳州縣隸
焉其年廢州以縣屬洧州九年洧州廢又屬許州

洧水縣西二十二里

陳州

淮陽上

開元戶五萬二千六百九十二
元和戶四千三十八

鄉一百四
鄉三十一

禹貢豫州之域本太昊之墟周武王封媯滿于陳春秋
時楚滅之秦滅楚屬潁川郡漢高帝分潁川置淮陽國
後漢章帝改為陳國獻帝末陳王寵為袁紹所殺國除
為陳郡曹魏復為陳國以東阿王植為陳王植子志徙
封濟北又為陳郡晉宋因之東魏孝靜帝以淮南內附
置北揚州理項城乃于項城僑立北丹陽郡及稜陵縣
高齊文宣帝以百姓守信不附侯景改北揚州為信州
周武帝改信州為陳州隋開皇二年改為沈州大業二

年廢沈州入陳州三年改為淮陽郡武德元年復為陳

州

州境

東西一百六十九里
南北二百八十里

八到

西至上都一千五百二十里
北至東都六百六十里

東至亳州二百里

東南至潁州三百里

北至許州二百六十里

西北至汴州三百一十里

西南至蔡州二百二十里

東北至宋州二百二十五里

貢賦

開元貢
粟 綿 絹

管縣六

宛丘 太康 項城 南頓 潑水 西華

宛丘縣

緊郭下

本漢陳縣春秋時楚滅陳縣之秦漢仍為陳縣漢屬淮陽國後漢屬陳郡晉屬梁國宋屬陳郡高齊文宣帝省陳郡仍移項縣理于此隋文帝罷陳郡改項縣為宛丘縣

陳州州城枕蔡水周迴三十里

宛丘縣南三里爾雅陳有宛丘又丘上有丘為宛丘注
四方高中央下曰宛

固陵縣西北四十三里項羽敗南走固陵此也

洧水西自許州鄆陵縣界流入

蔡州自西北流入經縣理東一里

州理城楚襄王所築即古陳國城也包義氏神農氏並
都于此及楚頃襄王為秦所伐失鄆郢徙都于陳卒為
秦所滅

弩臺在縣理古陳城南八十步後漢陳敬王曾孫寵善弩射十發皆同處常于此臺教弩黃巾賊起寵有強弩千張故惟陳國保全開元九年移孔子廟于臺上

東門池在州城東門內道南詩陳風東門之池可以漚麻卽此池

八卦臺及壇縣北一里古伏羲氏始畫八卦于此

太康縣

縣南至州七十里

本漢陽夏縣地屬淮陽國後漢屬陳國後魏孝昌四年

置陽夏郡以縣屬焉隋文帝改陽夏為大業縣

蔡水西北自汴州尉氏界流入

渦水首受蔡水東流經縣北

縣理城即漢陽夏縣城夏后太康所築漢五年高祖追擊項羽至陽夏南羽敗走固陵是也

項城縣

上西北至州一百里

漢項縣古項子國春秋齊師滅項至楚襄王徙都陳以項為別都按此城即楚築在漢屬汝南郡晉屬陳國隋

文帝改項縣加城字屬陳州東晉孝武時秦將苻融攻陷壽春苻堅捨大軍于項城輕騎八千兼道赴之時有謠曰堅不過項堅出令曰敢言吾在壽春者拔其舌衆諫不從堅遂敗

武邱縣東南四十里本名邱頭魏王凌密謀廢立司馬宣王將中軍討陵大軍掩至百尺堰凌自知勢窮軍到邱頭面縛水次因改邱頭為武邱以旌其功即此也小汝水西南流入去縣五十里

公路故城縣東四里漢末袁術所築

故誘城縣北三十里魏毋丘儉作亂西至項鄧艾督軍至樂嘉以誘之後人因謂之誘城

百尺堰縣東北三十五里司馬宣王討王陵軍至百尺堰即此地

南頓縣 上北至州七十五里

本漢舊縣屬汝南郡古頓子國後逼于陳南徙故號南頓其城楚令尹子玉所築後漢世祖父欽嘗為此縣令

故號南頓君

光武生于
此縣中

宋為南頓郡東魏于此置和城

縣北齊廢郡省縣入和城隋復為南頓縣屬陳州武德
六年省入項城證聖元年以縣有光武鄉名符武氏遂
于此置光武縣中宗復為南頓

潁水縣西北三十里

小汝水縣西南四十里

高陽邱縣南四十里應瑒南頓人兄弟俱有名自比高
陽氏才子故號高陽邱

澉水縣 上北至州八十四里

本漢汝陽縣屬汝南郡晉屬汝南國宋又屬汝陽郡隋開皇三年屬陳州十六年改汝陽為澉水縣建中二年屬澉州興元二年澉州廢改屬陳州

澉水經縣北去縣三里

澉灌城縣東北二十五里本魏將鄧艾所築艾為典農使行陳潁之間東至壽春艾以為田良水少不足盡地利遂開築陂塘大興澉灌軍儲豐足因名此城

乾谿臺在縣北三里左傳楚靈王有乾谿之臺即此也

西華縣

上東至州八十里

本漢舊縣屬汝南郡後漢因之晉無西華縣宋復置屬陳郡高齊省後魏太和中復置武城縣神龍元年又為基城景雲復為西華

潁水縣南二十里

洧水縣西二十里

集糧城在縣西十里魏使鄧艾營田築之貯糧故名



元和郡縣志卷九